

27. september 2022

UKA2022/123

**Nuup kiisalu Qasigianguit Aasiaallu pilersorneqarnerannut erngup nukinganik nukissiorfinnik taakkunungalu atatillugu atortunik sanaartornermut, aningaasalersuinermit ingerlatsinermullu killiliussatut atugassarititaasut pillugit Inatsisartut inatsisaata allangortinneqarnissaa pillugu Inatsisartut inatsisaat**

(Nunalerinermit, Imminut Pilersornermut, Nukissiutinut Avatangiisinullu Naalackersuisoq)

Siunnersuummut Nunalerinermit, Imminut Pilersornermut, Nukissiutinut Avatangiisinullu Naalackersuisup siunnersuutaanut Siumumiit imaattumik oqaaseqassaagut.

Siumuminngaanniit kalaallit nunatsinni nukissiuuteqarnermi ineriartorneq peqataaffigeqqissaarlugu aallaqqaataaniilli iliuseqqataaffigisimaqaarput, sulilu ineriartuarlugu nunap nammineq tunniussinnaasaa nukik (imeq) atorluarlugu nunatsinni inerisaaqqittuassaagut.

Nunarsuatta sinnerani nukissiuutit assigiingitsutigut inerisarneqarnerat eqqaassagaanni uagut nunatsinni annertooujussuarmik imerminngaanniit aallaavilimmik innaallagissamik sarfalioreqarnerput ilisarnaatigaarput. Illoqarfinni arlaqalersuni inerisaaqataanitsinnik sulilu amerliartortitsinnik iliuseqqataajuarnitsinnillu tunuliaqutilinnik. Taamaammat Siumuminngaanniit iluunngarluta nunarsuarmioqatitsinnut nuannaarutigingaarlugu tanngassimaarutigisaqaarput.

Taamaaliornittami takutittuarmagu orsussamik imerpalasumik nunani allaninngaanniit eqqussuinerput milliartuaartinneqartoq, aamma silaannarmut aniatittagarput CO2 annikinnerulersikkiartuarneqartoq.

Siumup politikikkut anguniartuassavaa kalaallit nunatsinni mingoqannginnerpaamik nunarsuarmioqataanitsigut sarfaliornikkut inerisaajuarnissarput.

Kalaallit nunattami ineriartornerata malitsigisariaqarpaa atorfissaqartitavut ineriartoqqissappata aningaasanik malitseqartitsinissaat. Sualummik nukissiuuteqarnikkut pitsaasumik ineriartortitsissagutta allilerinissaq pinngitsoorneqarsinnaanngilaq, allilerinissarlu sumiiffiup ineriartoqqinnissaanut matuersaataajuartussaavoq.

Taamaammat Naalackersuisup siunnersuutaa Siumuminngaanniit paasilluarparput siunissamullu aningaasaliinerulluartussatut isigalutigu.

Siumumit maluginiarparput, Naalackersuisut nukissiuutinut aningaasalersuinermit siunnersuuteqarnerminni Nuup, Qasigianguit Aasiaallu pigaat. Siumumit isumaqarpugut nukissiorfiornerit allat pisariaqartut ilanngullugit eqqartortariaqarivut, taamaattumillu



naatsorsuutigaarput – assersuutigalugu Tasiilami nukissiorfiup  
allilertariaqarnera – ilanngullugu ataatsimiititaliami  
eqqartueqatigiissutigiumaaripput.

Naalackersuisut alloriaqqinnissamik siunnersuutaat una kinguaassatsinnut  
iluaqutaalluarumaartoq naatsorsuutigeqqissaarlugu tamakkiisumik tapersensoratsigu  
oqaatigissavarput.

Siumumit taamatut oqaaseqarluta siunnersuut ataatsimiisitaliamut susassaqartumut  
ingerlateqqipparput.

Mala Høy Kúko, Siumut